

元和郡縣志



元和郡縣志卷十七

唐李吉甫撰

河東道

四

汾州

西河望

開元戶五萬三千七十六
元和戶八千三百四

鄉一百一十四
鄉一百一十八

禹貢冀州之域其在虞舜十二州及周皆屬并州春秋時為晉地後屬魏謂之西河子夏居西河吳起為西河守皆謂此也秦屬太原郡漢武帝元朔四年置西河郡領縣三十六理富昌縣是也後漢徙理離石即今石州

離石縣也獻帝末荒廢魏黃初二年乃于漢茲氏縣置西河郡即今州理是也晉惠帝時為劉元海所攻破郡遂廢後魏孝文帝太和八年復于茲氏舊城置西河郡屬吐京鎮按吐京鎮今隰州西北九十里石樓縣是也十二年改吐京鎮為汾州西河郡仍屬焉明帝時為胡賊所破因北移西河郡理平陽界高齊又于此城置南朔州周武帝廢南朔州宣帝于此置汾州隋大業三年廢汾州還于隰城縣置西河郡皇朝初改為涪州武德三年又改涪州為汾州

州境 東西一百六十四里 南北二百八十五里
 八到 西南至上都一千九十里 東南至東都九百三十里 東南至潞州四百四十里 東南至沁州二百六十里 西南至隰州二百七十里 西北至石州一百六十里 東北至太原府一百七十里

貢賦 開元貢 龍鬚席 石膏 賦 布 麻 菽 粟

管縣五

西河 孝義 介休 靈石 平遙

西河縣 望郭下

開元戶一萬二千三百七十五 鄉二十五 案自此以後各縣及靈州並缺元和戶鄉數

本漢茲氏縣也晉魏于此置西河郡晉改為國仍改茲氏縣為隰城縣上元元年改為西河縣今城內有晉西河王斌碑文字殘缺

謁泉山在縣東北四十里一名隱泉山上有石室去地五十餘丈頂上平地可十頃相傳以為子夏石室比干山在縣北一百一十里

文湖一名西河泊在縣東十里多蒲魚之利

八門城在縣北十五里劉元海遣將喬嵩攻西河築營

自固營有八門因名

卜商祠在縣北四十里

孝義縣 緊西北至州三十五里

開元戶一萬六百八十五

案鄉數傳寫缺

本漢茲氏縣地曹魏移西河郡中陽縣于今理永嘉後省入隰城後魏又分隰城于今靈石縣東三十里置永安縣貞觀元年以縣名與涪州縣名同改為孝義縣因縣人郭興有孝義故以名焉
勝水在縣南一里

團城在縣西北十八里後魏築以防稽胡其城紆曲故名團城

魏文侯墳在縣西五里

段干木墓在縣東北二十五里

介休縣

望西北至州六十五里

開元戶一萬一千三百八十三

鄉二十二

本秦漢之舊邑在介山西因名之後魏明帝時為胡賊所破至孝靜帝更修築遷朔州軍人鎮之因立為南朔州但領軍人不領郡縣其介休縣仍屬汾州高齊省介

休入永安縣周武帝省南朔州復置介休縣宣帝改介休為平昌縣隋開皇末又改平昌為介休縣義寧元年于縣置介休郡武德元年改郡為介州貞觀元年廢介州以縣屬汾州

介山在縣西南二十里

雀鼠谷在縣西十二里

汾水在縣北十二里

鄔城泊在縣東北二十六里周禮并州之藪曰昭餘祁即鄔城泊是也

郭林宗墳在縣東三里周武帝時除天下碑惟林宗碑
詔特留

靈石縣 上北至州一百二十里

開元戶三千七百三十一 鄉八

本漢介休縣地隋開皇十年因巡幸開道得瑞石遂于
谷口置縣因名靈石皇朝因之

介山在縣東四十二里

汾河在縣北十步深一丈闊三丈

賈胡堡在縣南三十五里義寧元年義師次于霍邑隋

將宋金剛拒不得進屯軍此堡有霍山神見靈事已具

于霍邑縣敘事

平遙縣 望西北至州八十里

開元戶一萬八千九百七 鄉三十八

本漢平陶縣地屬太原郡後魏隸西河郡魏以太武帝
名燾改平陶為平遙隋屬西河郡義寧元年于介休縣
置介休郡以平遙縣屬焉武德元年于此置介州縣屬
不改貞觀元年省州縣屬汾州

麓臺在縣東南五十二里

京陵故縣在縣東七里漢京陵縣晉九原地也禮記注曰九原晉卿大夫之墓地也

中都故城在縣西十二里屬太原郡漢文帝為代王都于此

沁州 陽城中下

開元戶六千五百八十 鄉一十三
元和戶二千二百二十 鄉一十三

禹貢冀州之域春秋時其地屬晉戰國屬韓在秦為上黨郡地今州即漢上黨郡之穀遠縣地也隋開皇十六年于此置沁州因州東沁水為名大業二年省沁州武

德元年重置

州境 東西一百五十里 南北二百六十四里

八到 西南至上都一千二十里 東南至東都六百三十里

西南至晉州二百九十里 西至晉州霍邑縣一百五十里

西北至汾州二百六十里 東北至太原府三百四十里

東南至潞州三百三十里

貢賦 開元貢 龍鬚席 賦 布 麻

管縣三

沁源 和川 綿上

沁源縣 中郭下

開元戶二千二百五十四 鄉五

本漢穀遠縣地舊在今縣南百五十里孤遠故城是也
語音訛轉故以穀為孤耳後魏莊帝于今理置沁源縣
因沁水為名也屬義寧郡隋開皇三年罷郡置縣屬晉
州十六年置沁州縣屬焉

霍山一名太岳在縣西七十八里

沁水自綿上縣界流入在縣東一里

和川縣 中下北至州七十里

開元戶二千八十 鄉四

本漢穀遠縣地後魏莊帝于今縣南九里置義寧縣屬
義寧郡隋開皇三年罷郡改屬晉州十六年置沁州縣
屬焉十八年改為和川縣大業三年省武德元年重置
烏嶺在縣西十六里

沁水在縣東十里

棄波水在縣東八十步

冀缺墓在縣南三十六里

綿上縣 中下南至州七十六里

開元戶一千八百一十五 鄉四

本漢穀遠縣地隋開皇十六年置綿上縣屬沁州以縣

西界有綿上地因以為名

羊頭山一名謁戾山在縣東北五十里沁水所出

沁水一名少水出縣東南二十四里覆餗山左傳曰齊

侯伐晉封少水為京觀也

霍山在縣西南八十里

儀州 樂平下

開元戶七千九百九十五 鄉二十九
元和戶一千六百五十一 鄉二十一

禹貢冀州之域春秋時其地屬晉戰國屬韓秦為上黨

郡地今州理即漢上黨郡之涅氏縣地也後漢于此置

陽阿縣屬上黨郡晉改為轅陽屬樂平郡後魏明帝改

轅陽為遼陽隋開皇十六年于遼陽故城置遼山縣屬

并州即今州理是也武德三年于此置遼州八年改為

箕州因遼山縣界箕山為名先天元年以與玄宗諱同

聲改為儀州因州東夷儀嶺為名也

州境 東西二百五十里
南北一百九十五里

八到 西南至上都一百四十里
西南至東都七百八十里

正東微南至洛州三百六十里
南至潞州三百一十里
西至太原府祁縣三百里
西北至太原府三百四十五里
北至太原府樂平縣二百六十里

貢賦

開元貢 人參三十兩
案開元賦傳寫缺

管縣四

遼山 榆社 平城 和順

遼山縣

中郭下

開元戶二千一百九十 鄉五

本漢涅氏縣地後漢于此置陽阿縣屬上黨郡晉改為

遼陽縣屬樂平郡後魏明帝改為遼陽隋開皇十六年

改置遼山縣因縣西北遼山為名皇朝因之

箕山在縣東四十五里上有許由冢按司馬遷傳曰余

登箕山上有許由冢則在今洛州陽城縣不當在此

五指山在縣東五十里

祝融祠在縣北二里

榆社縣

中東至州一百一十里

開元戶二千七百一十 鄉六

本漢涅氏縣地晉于今縣西北三十五里置武鄉縣屬

上黨郡石趙時改屬武鄉郡隋開皇十六年于此置榆

社縣屬韓州今潞州襄垣縣理是也因縣西北榆社故城為名大

業二年省義寧二年又置武德三年于縣置榆州縣屬

焉六年廢榆州以縣屬遼州後屬儀州縣城故武鄉城

也石勒時築前趙錄曰石勒上黨武鄉人僭號後還令

曰武鄉吾之豐沛其復之三世

石勒漚麻池在縣北三十里即勒微時與李陽所爭處

今枯固纔有處所

平城縣下東南至州九十里

開元戶九百五十四 鄉三

本漢涅氏縣也晉置武鄉縣地屬焉隋開皇十六年于

趙簡子所立平都故城置平城縣屬遼州大業三年改

屬并州武德三年改屬榆州六年省榆州改屬遼州貞

觀八年改屬箕州先天元年改屬儀州

八賦嶺在縣西南三十里武鄉水所出

和順縣中南至州八十五里

開元戶二千一百二十九 鄉五

本漢沾縣地即韓之闕與邑也史記曰秦伐韓闕與趙

惠文王使趙奢救之大破秦師卽此地也隋開皇十年
于今理置和順縣屬并州因縣東北和順故城以爲名
九京山在縣西十里

清漳水在縣北

嵐州

樓煩下

開元戶一萬七百二十六 鄉二十二
元和戶六千三百八十二 鄉三十三

禹貢冀州之域周并州之域春秋屬晉晉滅後爲胡樓
煩王所居趙武靈王破以爲縣秦爲太原郡地在漢卽
太原郡之汾陽縣地也漢末大亂匈奴侵邊自定襄以

西盡雲中雁門西河之間遂空建安中曹公糾率散亡
立新興郡晉末陷劉元海後魏于今理置嵐州因州西
岢音荷嵐山以爲名也隋大業四年于靜樂縣界置樓煩
郡因漢樓煩縣爲名隋亂陷賊武德四年平劉武周置
東會州六年省東會州重置嵐州天寶元年改爲樓煩
郡乾元元年復爲嵐州

州境

東西三百一十里
南北二百七十八里

八到

南至上都取太原路一千五百八十里取石隰路
一千三百七十五里

東南至東都一千二百二十里
東至忻州二百四十里

東南至太原府三百二十里

南至石州二百四十里

西至黃河一百八十里河上有合河關從關西至

麟州一百二十里

東北至代州三百里

東北至朔州三百七十四里

貢賦 開元貢 熊皮 石蜜 賦 布 麻

管縣四

宜芳 靜樂 合河 嵐谷

宜芳縣 上郭下

開元戶五千五百二十四 鄉十一

本漢汾陽縣地屬太原郡後魏于此置岢嵐縣隋開皇

十八年改爲汾源縣大業四年改汾源爲靜樂縣八年

分靜樂置嵐城縣屬樓煩郡武德四年改爲宜芳縣

岢嵐山在縣北九十八里高二千餘丈西北與雪山相

接

岢嵐鎮在縣西北九十八里

秀容故城在縣南三十里劉元海感神而生姿容秀美

因以爲名也

靜樂縣 上西至州四十五里

開元戶三千四百八十七 鄉七

本漢汾陽地城內有堆阜三俗名三堆城隋開皇三年自今宜芳縣北移岢嵐縣于三堆城十八年改爲汾源縣大業二年改爲靜樂縣武德四年于縣置北管州因管涔山爲名六年省縣屬嵐州

管涔山在縣北百三十里汾水源出焉初劉曜隱于此山山神使二童子獻劍于曜曰管涔山王使謁趙皇帝獻劍

伏戎城在縣北八十里隋樓煩郡所理也隋汾陽故宮在縣北百二十里

樓煩關在縣北百五十里

天池在縣北燕京山上周迴八里陽旱不耗陰霖不溢故老言嘗有人乘車風飄墮池有人獲車輪于桑乾泉後魏孝文帝以金珠串魚七頭放此池後亦于桑乾泉得之隋煬帝嘗于池南置宮每夜風雨吹破宮竟不成今池側有祠謂之天池祠

合河縣 中東至州一百八十里

開元戶一千八百五十九 鄉四

本漢汾陽縣地後魏于蔚汾谷置蔚汾縣屬神武郡隋

開皇三年罷郡縣屬石州大業二年改為臨泉縣四年屬樓煩郡武德七年改為臨津縣屬嵐州貞觀元年改為合河縣以城下有蔚汾水西與黃河合故曰合河黃河在縣西二里

合河關在縣北三十五里

蔚汾關在縣東七十里

隋長城起縣北四十里東經幽州延袤千餘里開皇十六年因古蹟修築

嵐谷縣 中南至州九十里

開元戶四千六百五十七 鄉九

隋大業三年置岢嵐鎮壓草城川賊路長安三年于此

置嵐谷縣景龍年廢 案新舊唐書並作神龍二年廢 開元十二年重置

因取嵐谷為名

石州 昌化下

開元戶九千二百六十二 鄉三十二
元和戶五千二十 鄉三十二

禹貢冀州之域虞及周屬并州春秋時屬趙亦為白狄之地今步落稽其胄也在秦為西河郡之離石縣靈帝末黃巾大亂百姓南奔其郡遂廢魏黃初三年復置離

石縣晉惠帝末劉元海起于河西攻陷郡縣其離石又沒于賊石勒時改爲永石郡後魏明帝改爲離石郡高齊文宣帝于城內置西汾州周武帝改爲石州隋大業二年又爲離石郡武德元年改爲石州五年置總管七年改爲都督貞觀六年復爲石州

州境

東西一百九十里
南北三百三里

八到

西南至上都一千二百五十里
東南至東都一千九十里
東南至汾州一百六十里
正南微東至隰州二百五十里
西渡河至綏州二百三十里
北至嵐州二百五十里

貢賦

開元貢 胡女布 龍鬚席 麝香 蜜蠟
賦 布 麻

管縣五

離石 平夷 定胡 臨泉 方山

離石縣

中郭下

開元戶二千七百七十三 鄉五

本漢舊縣也屬西河郡縣東北有離石水因取名焉漢末荒廢魏黃初復置後陷劉元海石勒改爲永石郡高齊文宣帝于此置昌化縣屬懷政郡後周復爲離石屬石州隋氏不改皇朝因之

離石山今名赤洪嶺在縣西五十步高歡大破爾朱兆于赤洪嶺蓋此處也

盧城在縣東二十里晉并州刺史劉琨所築以攻劉曜平夷縣 中東至州五十一里

開元戶一千五百七十一 鄉四

本漢離石縣地周宣帝割縣西五十一里置平夷縣屬石州隋氏不改皇朝因之

黃河西去縣四十五里

寧鄉水在縣西南一百五十步

定胡縣

中東至州九十五里
開元戶二千六百九 鄉五

本漢離石縣地周宣帝大象元年于此置定胡縣隋因之武德三年于縣置西定州貞觀二年廢州置孟門縣七年廢縣為孟門鎮八年廢鎮復為定胡縣

黃河去縣西二百步

孟門關在縣西一百步河東岸

臨泉縣 中下南至州一百七十里

開元戶一千五百九十六 鄉五

本漢離石縣地周大象元年于此置烏突郡烏突縣隋開皇元年改烏突郡為太和郡烏突縣為太和縣三年廢郡以太和縣屬石州武德三年改太和縣為臨泉縣臨泉水在縣北一百步縣因此水為名

黃河在縣北二十里

方山縣

中南至州九十里

開元戶一千三百五十三

鄉四

本漢離石縣地高齊文宣帝于此縣北六十八里置良泉縣屬離石郡隋大業三年移就今縣南三十五里方

山置故名方山貞觀十一年移于今理

赤洪水在縣南五十里

三角戍在縣北七十三里

元和郡縣志卷十七

元和郡縣志卷十八

唐李吉甫撰

河東道五

忻州 定襄下

開元戶一萬四千三百三十八 鄉二十八
元和戶四千二百四 鄉二十九

古并州之域春秋時為晉地戰國為趙地秦為太原郡地今州即漢太原郡之陽曲縣也按漢陽曲縣在今州東四十五里定襄縣理是也後漢末大亂匈奴侵邊自定襄以西盡雲中雁門之間遂空曹公立新興郡以安

集之理九原即今州是也後魏宣武帝又于今州西北十八里故州城移肆州理此因肆盧川為名也隋開皇十八年改置忻州因州界忻川口為名也大業二年省忻州義旗初又置新興郡武德元年廢郡復置忻州二年陷劉武周四年武周平依舊置忻州

州境 東西一百四十五里 南北八十六里

八到 西南至上都一千四百四十里 南至東都一千七十里

南至太原府一百八十里 西至嵐州二百四十里 東北至代州一百六十里

貢賦 開元貢 麝香 扇十五枚 賦 布 麻

管縣二

秀容 定襄

秀容縣 上郭下

開元戶七千一百三十八 鄉十一

本漢陽曲縣地屬太原郡後漢末于此置九原縣屬新興郡後魏莊帝于今縣東十里置平寇縣隋開皇十八年于此置忻州又于今縣西北五十里秀容故城移後魏明元所置秀容縣于今理屬忻州國朝因之

滹沱水在縣東三十二里

定襄縣

上東至州四十五里

開元戶五千五百三十二 鄉十七

本漢陽曲縣屬太原郡黃河千里一曲縣當其陽故曰陽曲後魏末移陽曲縣于太原界仍于此城置定襄縣屬新興郡高齊省武成帝移平寇縣于此隋開皇十年移平寇于崞城今代州崞縣是也武德四年分秀容縣于漢陽曲城重置定襄縣
聖阜今名聖人山在縣東北二十里石上手足跡猶存

滹沱水西自秀容縣界流入

代州

雁門中都會府

開元戶一萬五千七十七 鄉二十八
元和戶二千一百二十 鄉四十

古并州之域春秋時為晉地戰國時屬趙史記曰趙襄子與韓魏共滅智伯分晉地則趙有代勾注之北今按勾注在州西北三十五里雁門縣界西陘山是也秦置三十六郡雁門是其一焉漢因之後漢末匈奴侵邊其地荒廢周宣帝大象元年自九原城移肆州于今理隋開皇五年改肆州為代州大業三年改為雁門郡隋氏

喪亂陷于寇境武德四年平代置代州都督府

州境 東西三百二十里 南北三百二十八里

八到 西南至上都一千六百里 南至東都一千二百三十里

東南取崩石嶺至恒州五百四十里 西至嵐州三百里

北至朔州一百二十里 東北至蔚州四百里

貢賦 開元貢 鵬翎五具 麝香 布 麻

管縣九

雁門 繁峙 五臺 唐林 崞

雁門縣 上郭下

開元戶五千二百二十一 鄉十

本漢廣武縣地屬太原郡後漢改屬雁門郡隋開皇三年罷郡縣仍屬肆州後改肆州為代州縣屬不改十八年改廣武縣為雁門縣蓋避太子之諱也國朝因之夏屋山在縣東北三十五里史記曰趙襄子北登夏屋誘代王使廚人操銅料擊殺之遂有代地

勾注山一名西陘山在縣西北三十里晉咸寧元年勾注碑曰蓋北方之險有盧龍飛狐勾注為之首天下之阻所以分別內外也漢高祖欲伐匈奴不從婁敬之說

械繫于廣武遂踰勾注困于平城謂此地也

河神祠在縣南開元九年并州長史張說奏置

繁峙縣 中西至州六十里

開元戶一千五百九十三 鄉五

本漢舊縣屬雁門郡漢末匈奴侵寇舊縣荒廢百又直繁峙縣周省隋開皇十八年重置于今縣東六十里大堡成大業十二年移于武州城聖歷二年以縣在平川難于固守遂東移于今理其城三面枕澗東接峻岨極為險固

秦戲山一名武夫山在縣東南九十里滹沱水出焉

五臺縣 中西北至州一百二十里

開元戶二千一百六十五 鄉五

本漢慮虜縣 慮音閭 虜音夷屬太原郡因慮虜水為名也晉省

後魏孝文帝復置即今縣理是也屬新興郡高齊改屬

雁門郡隋大業二年改為五臺縣因山為名也

五臺山在縣東北百四十里道經以為紫府山內經以

為清涼山

慮虜水在縣北十五里

唐林縣 中東北至州一百一十里

本漢廣武縣地證聖元年分五臺崞二縣置武延縣唐

隆元年改為唐林縣

滹沱水在縣東

沙河在縣南二里

崞縣 中東北至州五十里

開元戶二千七百四十八 鄉五

本漢舊縣因山為名屬雁門郡漢末荒廢晉初又置魏改為崞山縣後魏宣武帝移雁門郡理此隋開皇十年

移平寇縣于此屬代州大業二年改為崞縣

滹沱水在縣東二百步

蔚州 興唐下

開元戶四千八百八十七 鄉十一
元和戶一千五百六十三 鄉十二

禹貢冀州之域虞及周屬并州周禮并州川曰滹夷浸曰涑易今滹夷在靈丘涑易在飛狐皆在州境春秋時其地屬晉戰國時屬趙襄子殺代王有其地後武靈王置雲中雁門代郡秦亦為代郡漢元年項羽徙趙王歇為代王二年陳餘迎歇還趙歇又立餘為代王三年韓

信斬陳餘置代郡領縣十八東魏孝靜帝又于此置北

靈丘郡周宣帝于今理置蔚州隋大業三年罷州置雁

門郡武德四年平劉武周重置蔚州

州境 案州境中數傳寫缺

八到 西南至上郡二千里南至東都一千六百三十里

東至恒州取方秦嶺路四百九十里東南至定州取轆轤山路四百九十里

東至易州山路三百六十里西南至代州四百里

西至朔州二百八十里北至天成軍一百八十里

東北至媯州界孔嶺關一百里從關至媯州一百五十里

貢賦 開元貢 熊皮 豹皮 賦 布 麻

管縣三

興唐 靈丘 飛狐

興唐縣 下郭下

開元戶一千四百七十二 鄉四

本靈丘縣也開元十二年于州東北一百三十里橫野

軍子城南置安邊縣屬蔚州天寶元年改為安邊郡仍

自靈丘移州理于安邊城至德二年改為興唐郡仍改

安邊縣為興唐縣

倒刺山在縣東七十里亦號雪山俗傳靈仙所居與五臺山略等

漚夷河亦曰瓠瓠河上槽狹下流闊有似瓠瓠因名大韭多生于山及平野魏孝文所種以濟軍需後沃壤處皆長三尺葉廣于馬蘭但味少短耳

橫野軍置在州城內

靈丘縣

中下東北至州一百三十里

開元戶二千四百二十一

鄉五

本漢舊縣屬代郡後魏省東魏孝靜帝重置屬靈丘郡

隋開皇三年罷郡縣屬蔚州大業二年省蔚州改屬代州隋末陷賊武德二年又置靈丘縣屬蔚州

太白山在縣南十里山有鍾乳穴其深不測仰望穴中乳如懸穗焉

石銘陁嶺在縣西北八十里上有石銘題言冀州北界故謂石銘陁

隘門山亦名隘口在縣東南十五里壁立直上層崖刺天有石道極險陁後魏明元帝置義倉之所

漚夷水一名漚水出縣西北高是山周禮曰并州其川

漚夷謂此也

茲水出縣西枝迴山懸河五丈湍激之聲響動山谷樵
棧之士咸由此度巨木淪渚久乃方出或落崖石無不
粉碎也土地記云枝迴嶺與高是山連麓接勢

開皇長城西自繁峙縣經縣北七十里東入飛狐縣界
趙武靈王墓在縣東三十里

飛狐縣

下西至州一百五十里

開元戶九百九十二

鄉三

本漢廣昌縣地屬代郡後漢屬中山國晉又屬代郡隋

開皇三年改屬蔚州仁壽元年改爲飛狐縣因縣北飛
狐口爲名也隋末陷賊武德六年重置寄理今易州遂
城縣界遙屬蔚州貞觀五年移還今所

磨笄山在縣東北一百五十里趙襄子姊爲代王夫人
襄子旣殺代王迎其姊夫人曰以弟慢夫非仁也以夫
怨弟非義也磨笄自刎百姓閔之爲立祠

倒刺山在縣東北百二十里出佳大黃

飛狐道自縣北入媯州懷戎縣界卽古飛狐口也酈食
其說漢王曰杜白馬之津塞飛狐之口此言皆一方之

阨也又劉琨自代出飛狐口奔于安次亦謂此道也
 三河治舊置鑪鑄錢至德以後廢元和七年中書侍郎
 平章事李吉甫奏臣訪聞飛狐縣三河治銅山約數十
 里銅鑛至多去飛狐錢坊二十五里兩處同用拒馬河
 水以水斛銷銅北方諸處鑄錢人工絕省所以平日三
 河治置四十鑪鑄錢舊跡並存事堪覆實今但得錢本
 令本道應接人夫三年以來其勢卽立救河東困竭之
 弊成易定援接之形制置一成久長獲利詔從之其年
 六月起工至十月置五鑪鑄錢每歲鑄成一萬八千貫

時朝廷新收易定河東道久用鐵錢人不堪弊至是俱
 受利焉

朔州 馬邑下

開元戶六千三十 鄉十三
 元和戶七百二十九 鄉十六

禹貢冀州之域虞及周爲并州之地春秋時爲北狄地
 戰國時屬趙秦爲雁門郡地在漢卽雁門郡之馬邑縣
 也史記曰匈奴圍韓王信于馬邑信降匈奴按馬邑卽
 今州理是也漢末大亂郡遂荒廢建安中曹公又立馬
 邑縣屬新興郡晉改屬雁門郡晉亂其地爲猗盧所據

劉琨表盧為大單于封代公徙馬邑後魏都代地屬畿
 內孝文帝遷洛之後又于定襄故城置朔州葛榮之亂
 州郡又廢高齊文宣帝又于馬邑城置朔州即今理是
 也武成帝道北道行臺周武帝置朔州總管隋開皇罷
 總管大業三年罷州為馬邑郡皇朝改為朔州

州境 東西四百八十里
 南北九十七里

八到 西南至上都一千七百二十里
 南至東都一千三百五十里
 東至蔚州三百八十里
 西南至嵐州三百七十四里
 北至單于大都護府三百五十里
 東北至雲州三百四十里

貢賦 開元貢 白雕翎五具

管縣二

鄯陽 馬邑

鄯陽縣 中郭下

開元戶三千六百五十八 鄉十八

本漢馬邑縣屬雁門郡漢末荒廢建安中又置屬新興
 郡晉又屬雁門郡晉末又廢高齊于此置招遠縣屬郡
 不改隋開皇三年罷郡改屬朔州大業元年改為鄯陽
 縣

勾注山在縣東八十里

河水在縣西三百里

州城本漢馬邑城也昔秦人築城于武周塞以備胡城將成而崩者數矣有馬馳走周旋反覆父老異之因依而築城乃不崩遂名馬邑

馬邑縣 中西至州三十里

開元戶二千三百八十 鄉五

本鄠陽縣地開元五年分鄠陽縣于州東三十里大同軍城內置馬邑縣建中年間河中節度使馬燧權移州

于馬邑縣焉

桑乾河在縣東三十里

雲州 雲中下

開元戶三千一百六十九 鄉七
案元和戶鄉數傳寫缺

禹貢冀州之域虞及周屬并州春秋時為北狄地戰國時其地屬趙其後武靈王自代至高闕為塞而置雲中雁門代郡今州即秦雁門郡地在漢雁門郡之平城縣也史記曰漢七年韓王信亡走匈奴上自將逐之遂至平城為匈奴所圍用陳平秘計得出是也漢末大亂匈

奴侵邊自定襄以西雲中雁門西河遂空曹公鳩集荒
 散又立平城縣屬新興郡晉又改屬雁門晉亂劉琨表
 封猗盧為代王都平城後魏道武帝又于此建都東至
 上谷軍都關西至河南至中山隘門塞北至五原地方
 千里以為甸服孝文帝改為司州牧置代尹孝文帝遷
 都洛邑改置恒州孝昌之際亂離尤甚恒代之北盡為
 丘墟高齊文宣帝天保七年置恒安鎮徙豪傑三千家
 以實之今名東州城其年廢鎮又置恒州周武平齊州
 郡並廢又于其所置恒安鎮屬朔州自周迄隋仍為鎮

也隋亂陷賊武德四年平劉武周置北恒州七年廢貞
 觀十四年自朔州北界定襄城移雲州及定襄縣于此
 後為默啜所破移百姓于朔州開元十八年復置雲州
 及雲中縣

州境

東西一百七十七里
南北四百九十里

八到

西南至上都一千九百六十里
南至東都一千五百九十里

東至幽州七百里

東至清塞城一百二十里

又東至天城軍六十里

又東至納降守捉九十里與幽州分界

西至靜邊軍一百八十里

西南至太原府七百里

貢賦

開元貢

鴈翎五具
布麻

管縣一

雲中

雲中縣 中

本漢平城縣屬雁門郡漢末大亂其地遂空魏武帝又立平城縣屬新興郡晉改屬雁門郡後魏于此建都屬代尹孝文帝改代尹為恒州縣屬不改隋為雲內縣屬馬邑郡貞觀十四年朔州北界定襄城移于此後為默啜所破移百姓至朔州開元十八年改置雲中縣屬雲

州

白登山在縣東北三十里

火山在縣西五里山有火井深不見底以草投之則烟騰火發有火井祠

紇真山在縣東三十里虜語紇真漢言三十里其山夏積霜雪

單于臺在縣西北四十餘里漢武帝元封元年勒兵十八萬騎出長城北登單于臺即此也

元和郡縣志卷十八

元和郡縣志卷十九

唐李吉甫撰

河東道

潞州 上黨大都督府

開元戶六萬四千二百七十六 鄉一百三十三
元和戶一萬七千八百 鄉一百二十

今為澤潞節度使理所 管潞州澤州邢州洛州磁
州 魏那洛本河北道今

隸澤潞節度使管內 管縣三十七
都管戶二萬六千二百四十二

禹貢冀州之域殷時為黎國春秋時屬晉又兼有潞子
之國潞子嬰兒為晉所滅戰國時屬韓別為都以其遠

韓近趙至趙孝成王時馮亭以上黨降趙復為趙地秦為上黨郡地後漢末董卓作亂移理壺關城即今州理是也周武帝建德七年于襄垣縣置潞州上黨郡屬焉隋開皇十年罷郡自襄垣縣復移潞州于壺關即今州是也州得名因潞子之國武德元年又于襄垣縣置韓州貞觀十七年廢開元七年以玄宗歷試嘗在此州置

大都督府

州境 東西二百九十三里 南北三百三十六里

八到 西南至上都一千三百三十里 南至東都四百七十里

東取穴陘嶺路至相州三百五十里

東南至澤州一百八十七里

西至晉州三百九十里

西北至沁州二百一十里

北至儀州三百一十里

東北至洛州四百五十里

貢賦 開元貢 人參 墨 賦 布 麻

管縣十

上黨 長子 屯留 潞城 壺關 黎城

銅鞮 鄉 襄垣 涉

上黨縣 望郭下

開元戶一萬一千三百八十三 鄉二十一

本漢壺關縣也隋開皇中分壺關置上黨縣屬潞州釋名曰黨所也在于山上其所最高故曰上黨

雞鳴山一曰火山在縣東南七十六里

濁漳水在縣西南二十二里

州城漢壺關縣也上黨記曰曹公之圍壺關起土山于城西北角穿地道于城西內築界城以遮之

五龍祠在縣東南二十里五龍山上慕容永所立以祭

五方神

馮亭墓在縣西五里

長子縣

繫東北至州五十二里

開元戶二萬二百六十六

鄉三十二

漢舊縣本春秋時地名左傳曰晉人執衛石買于長子是也慕容永僭號于此稱西燕為慕容垂所滅隋開皇九年移寄氏縣理此屬潞州十八年改寄氏為長子縣發鳩山在縣西南六十五里濁漳水出焉

羊頭山在縣東五十六里後漢安帝時羌寇河東以任尚為御史擊破于羊頭山謂此也

神農城後魏風土記曰神農城在羊頭山上山下有神

農泉卽神農得嘉穀之所

武訖嶺在縣南四十五里風土記曰秦趙戰于長平趙

軍敗退秦將白起逐至此名曰武訖嶺

屯留縣

上東南至州六十四里

開元戶八千一百六十六

鄉十七

本晉邑春秋曰晉人執衛行人孫蒯于屯留是也漢以

爲縣屬上黨郡高齊省隋開皇中重置屬潞州

絳水出縣西南方山去縣八十四里

潞城縣

上南至州四十里

開元戶七千四百六十四

鄉十六

本漢潞縣屬上黨郡卽春秋時赤狄潞子嬰兒國也晉

滅之後魏太武帝改潞縣爲刈陵縣屬襄垣郡隋開皇

十六年于此置潞城縣屬潞州

黃阜山在縣西北二十五里劉聰將綦母劼敗晉將崔

恕于黃阜

漳水一名潞水在縣北闕駟曰潞水在縣北爲冀州浸

卽漳水也按王猛與慕容評相禦于潞川評鬻水與軍

人絹疋水二石則此無他大川可以爲浸所有惟漳水

耳故土俗尚謂濁漳為潞水也

武王塢在縣西北四十里塢東有後魏天柱大將軍爾朱榮碑文曰建義元年東討逆賊鎮豎葛榮軍次上黨武王祠東有二狡兔從賊方而來天柱彎弓祝之曰中則擒葛榮不中則否應弦而殪遂擒榮

壺關縣 上西北至州三十里

本漢縣也屬上黨郡山形似壺于此置關故名壺關隋開皇十六年分壺關置上黨縣大業二年省壺關併入上黨武德四年重置

羊腸坂在縣東南一百六里沾水出焉

漢壺關三老令狐茂墓在縣東北一十九里上書明戾太子冤者

曹公壘在縣東南一百二里曹公攻高幹所築

黎城縣 中西南至州一百二十里

古黎國春秋曰晉荀林父滅潞立黎侯而還今縣東十八里黎侯城是也漢為潞縣之地後魏太武改潞縣為刈陵縣隋開皇十八年改刈陵為黎城縣武德初屬韓州貞觀十七年廢韓州屬潞州

古壺關在縣東二十五里春秋齊國夏伐晉取八邑有孟口孟口即壺口也聲相近故有二名

清漳水在縣東北五十里

濁漳水在縣西北五十六里

馮奉世墓及馮昭儀墓在縣東二里

銅鞮縣 上東至州一百五十里

本晉大夫羊舌赤邑時號赤曰銅鞮伯華漢以為縣屬上黨郡隋開皇十六年改屬沁州大業二年省沁州復屬潞州武德六年屬韓州貞觀十七年廢韓州復隸潞

州

石梯山在縣西三十里

闕與城在縣西北二十里史記曰秦昭襄王攻趙闕與趙奢曰其險狹譬如兩鼠鬪于穴中將勇者勝遂破秦軍解闕與之圍

晉銅鞮宮在縣東十五里子產曰今銅鞮之宮數里

斷梁城在縣東北三十里下臨深壑東西北三面阻澗

廣袤二里俗謂之斷梁城

叔向墓在縣東十八里

鄉縣 中東至州一百七十里

本漢涅氏地屬上黨郡晉始為武鄉縣屬樂平郡石氏分上黨置武鄉郡縣屬焉隋開皇初廢郡縣屬潞州晉縣原有武字後革創失其舊名

禿頂山在縣西北九十三里

石曰嶺在縣北六十五里

護甲水在縣西北八十里

襄垣縣 上南至州九十三里

本漢舊縣屬上黨郡趙襄子所築因以為名後魏孝莊

帝改為襄垣郡隋開皇十六年改襄垣縣置韓州縣屬

焉貞觀十七年廢州縣屬潞州

鹿臺山在縣南二十里

涅水在縣西北六十里

濁漳水在縣南二十一里

天井關在縣東南四十里置在天井谷內深邃似井因以為名魏武初遷鄴于此置關周建德六年廢

涉縣 上南至州一百八十里

本漢舊縣屬魏郡因涉河水為名晉屬廣平郡後省隋

開皇十年于故涉城重置涉縣屬磁州十六年改屬韓州貞觀十七年廢韓州縣屬潞州

清漳水一名涉河在縣南一里

澤州 高平上

開元戶二萬二千二百三十五 鄉五十九
元和戶三千五百二十七 鄉五十

禹貢冀州之域春秋時屬晉戰國時屬韓魏後屬趙秦使白起破趙于長平即今州北高平縣西北二十一里長平故城是也秦并天下今州即上黨郡地漢為上黨郡高都縣之地也後魏道武帝置建興郡孝莊帝改置

建州周改建州為澤州蓋取濩澤為名也 濩鳥怕反

州境 東西二百九十里 南北一百五十里

八到 西南至上都一千一百四十里 西南至東都二百八十里

東踰山至衛州四百一十里 西至絳州四百四十里

北至潞州一百四十九里 北至太原府大路六百一十里

貢賦 開元貢 白石英 人參 賦 布 麻

元和貢 白石英五十斤 野雞九十隻

管縣六

晉城 高平 陵川 沁水 陽城 端氏

晉城縣

上郭下

本漢高都縣屬上黨郡隋開皇三年改屬澤州十八年改爲丹川縣因縣東丹水爲名貞觀三年改置晉城縣太行山在縣南四十里禹貢曰太行恒山至于碣石注曰二山連延東北接碣石

丹水在縣北十二里司馬山俗傳秦坑趙衆流血丹川故名丹水斯爲不經也

天井故關一名太行關在縣南四十五里太行山上

高平縣

山南至州八十里

本漢涑氏縣屬上黨郡在涑水之上故以爲名後漢改爲玄氏屬建興郡高齊文宣帝省玄氏縣自長平高城移高平縣理之仍改高平縣屬高都郡隋開皇三年改屬澤州

頭顱山一名白起臺在縣西五里秦坑趙衆收頭顱築此臺

米山在縣東十里趙將廉頗積糧此山因名

涇水在縣西北三十六里

長平故城在縣西二十一里白起破趙四十萬衆于此

盡殺之

長平關在縣北五十一里

陵川縣 中西至州一百四十里

本漢泫氏縣地隋開皇十六年于此置陵川縣因川為名屬澤州

太行山在縣西南百里

沁水縣 中東南至州二百里

本漢端氏縣地後魏孝莊帝于此置秦寧郡及東永安縣高齊省郡而縣存隋開皇十八年改為沁水縣

沁水在縣東北五十二里

古王離城在縣東北五十里秦時王離擊趙所築四面絕險

陽城縣 中東至州一百一十里

本漢獲澤縣屬河東郡因獲澤為名也隋改屬澤州天寶元年改為陽城縣

析城在縣西南七十五里

獲澤在縣西北十二里墨子曰舜漁于獲澤

端氏縣 中南至州一百里

本漢舊縣也史記曰趙成侯十六年與韓魏分晉封晉
君于端氏肅侯元年奪晉君端氏徙處屯留漢以為縣
屬河東郡晉屬平陽郡後魏屬安平郡隋開皇三年罷
郡屬澤州

石門山在縣西南四十一里

沁水在縣南一里

邢州 鉅鹿上

開元戶五萬八千八百三十一 鄉一百二十一
元和戶三千六百九十二 鄉三十三

禹貢冀州之域亦古邢侯之國邢侯為紂三公以忠諫

被誅周成王封周公旦子為邢侯後為狄所滅齊桓公
遷邢于夷儀按故邢國今州城內西南隅小城是也夷
儀今龍崗縣界夷儀城是也春秋時屬晉後三家分晉
屬趙秦兼天下于此置信都縣屬鉅鹿郡項羽改曰襄
國蓋以趙襄子諡名也趙歇為趙王張耳為常山王並
理信都襄國今州理龍崗城是也前趙嘉平元年石勒
屯兵許昌張賓說勒曰觀王彌有王青州之心遲迴未
發者懼明公踵其後也明公獨無并州之思乎勒從之
遂長驅至鄴攻晉北中郎將于三臺張賓又進曰三臺

險固攻守未易卒下王彭祖劉越石大敵也宜及其未
 至密規進據牢城掃定并薊桓文之業可濟也邯鄲襄
 國趙之舊都依山憑險形勝之國可擇此二邑而都之
 王業可圖也勒于是進據襄國王浚遣兵五萬人來討
 勒勒欲挑戰張賓諫曰夫用兵當以己所便擊彼所不
 便今段末杯強悍且宜示之以弱鑿北壘為突門二十
 餘道伏精卒候賊列守未定出其不意插鼓奮勇直衝
 杯帳杯卒既奔則彭祖可指辰而定也勒從其計遂生
 擒末杯永嘉六年勒僭號遂定都焉至季龍徙都鄴為

襄國郡石氏既滅罷之後魏復為襄國縣隋開皇三年
 以襄國縣屬洛州九年改為龍崗縣十六年割龍崗等
 三縣置邢州以邢國為名也大業三年改為襄國郡武
 德元年改為邢州置總管二年陷竇建德四年討平之
 又為劉黑闥所陷五年擒之依舊為邢州

州境 東西二百八十二里
 南北一百三十六里

八到 西至上都一千九百里
 西南至東都八百四十里

東至貝州二百三十里
 東南至洛州一百二十里

西踰山至儀州二百三十五里
 東北至趙州一百九十里

貢賦 開元貢賦

文石獅子

絲布

管縣九

龍崗 堯山 鉅鹿 沙河 平鄉 南和

任 內丘 青山

龍崗縣 上郭下

古邢國也秦以為信都項羽更名曰襄國漢因不改石勒僭號據之勒未立前襄國有讖曰古在左月在右讓亡言或入口讖者以為胡有襄國也周武帝改為襄國郡隋開皇三年罷郡縣屬洛州九年改為龍崗縣以西

北有龍崗因名之十六年于此置邢州龍崗縣屬焉皇朝因之

土山在縣東百五十步昔冉閔攻石祗于襄國為土山地道于此

石井崗一名龍崗在縣西北七里崗上有井大如車輪石勒時天旱沙門佛圖澄于此握得一死龍長尺餘漬之以水良久乃蘇雨遂大降因名龍崗

夷儀嶺在縣西百五十七里

夷儀故城在縣西四十里今俗謂之隨宜城蓋語訛也

石勒墓在縣南十五里

堯山縣 上西南至州八十里

本曰柏人春秋時晉邑戰國時屬趙秦滅趙屬鉅鹿郡漢高祖八年從平城過趙趙相貫高壁人厠上要之上心動問縣名何曰柏人上曰柏人者迫于入也不宿去後魏改人為仁隋開皇三年罷鉅鹿郡屬趙州大業三年改屬邢州天寶元年改為堯山縣
泫水在縣西一里俗亦名曰脂溝
柏人故城在縣西北十二里

張耳臺在縣西北十二里

鉅鹿縣 上西至州一百一十九里

本漢南樂縣地隋開皇六年于此置鉅鹿縣屬趙州取漢鉅鹿縣之名也武德元年于此置起州又立白起縣二年陷竇建德四年討平罷起州以縣屬趙州貞觀元年改屬邢州

大陸澤一名鉅鹿在縣西北五里禹貢曰恒衛既從大陸既作按澤東西二十里南北三十里葭蘆芟蓮魚蟹之類充物其中澤畔又有鹹泉煮而成鹽百姓資之

沙河縣上北至州三十五里

本漢襄國縣地隋開皇九年改襄國為龍崗縣十六年分龍崗于此置沙河縣以沙河在縣南五里因以為名黑山在縣西四十里出鐵

磬口山在縣西南九十八里漢魏時舊鐵官也

平鄉縣上西至州九十里

本春秋時邢國後為趙地始皇滅趙以為鉅鹿郡亦大稱也張耳與趙王歇走入鉅鹿城王離圍之即此地也後魏自平鄉故城移平鄉縣于此理之屬廣平郡隋開

皇三年屬洛州十六年改屬邢州

濁漳水今俗名柳河在縣西南十里

落漢水在縣西南十八里

沙丘臺在縣東北二十里殷紂所築趙李兌圍武靈王于沙丘宮王探雀殼食之而死秦始皇東巡回死于沙丘

南和縣緊西南至州三十八里

本漢舊縣屬廣平國後漢屬鉅鹿郡石趙屬襄國郡周屬南和郡隋開皇三年屬洛州十六年改屬邢州

鴛鴦水經縣北五里

張寶墓在縣西十二里石勒軍師號曰右侯

任縣 上西南至州三十八里

本漢張縣地在今縣西南渚陽城是也後漢省趙于此

置苑縣石氏滅廢隋開皇十六年于此置任縣屬邢州

大業三年省武德四年重置

張城一名渚陽城在縣西南二十七里漢張縣也石勒

傳晉將王浚遣石季龍盟就六眷于渚陽謂此也

內丘縣 上南至州五十八里

古邢國地在漢為中丘縣屬常山郡晉于此立中丘郡

石趙改為趙安縣後魏孝文帝復立中丘縣隋室諱忠

改為內丘開皇三年屬趙州大業二年改屬邢州

鵲山在縣西三十六里昔扁鵲將號太子遊此山採藥

因名

青山縣 中東南至州五十里

本漢中丘縣地隋開皇十六年于此置青山縣屬邢州

縣界有青山因名大業二年省縣屬龍騰府武德元年

析龍崗內丘兩縣重置屬邢州

黑山一名青山在縣西二十里幽深險絕爲通逃之藪以周太祖諱黑因改黑山爲青山縣取名焉

雷公山在縣西南八里漢末黑山羣盜張飛燕等不立君長直以名號爲稱多髯者謂之羝公大聲者謂之雷公時有雷公賊保此因以爲名

洛州 廣平望

開元戶七萬七千一百五十

鄉一百四十六

案元和戶鄉數傳寫缺

禹貢冀州之域春秋時赤狄之地後屬晉荀林父敗赤狄于曲梁按曲梁卽今州理地也七國時屬趙趙敬侯

始都邯鄲至幽王遷爲秦所滅秦兼天下是爲邯鄲郡漢武帝置平干國宣帝改曰廣平自漢至晉或爲國或爲郡永嘉末石勒據有其地石氏滅又屬慕容雋至子暉滅又屬苻堅後慕容垂得山東其地復屬焉周武帝建德六年于郡置洛州以水爲名隋大業三年罷州爲永安郡武德元年又改爲洛州兼置總管二年陷于竇建德四年討平又爲建德舊將劉黑闥所陷尋討平之六年罷總管復爲洛州

州境

東西一百九十七里南北一百一十二里

雞澤縣

上西南至州五十里

本漢廣平縣地隋開皇十六年于廣平城置雞澤縣大業三年省武德四年重置

洛漳二水在縣東南二十五里合流東入平鄉縣界

洛水縣

上西至州五十里

本漢斥漳縣屬廣平國漳水經其城其地斥鹵故曰斥漳隋開皇六年以縣西近洛河改爲洛水屬洛州

衛漳故瀆俗名阿難渠在縣西二百步蓋魏將李阿難所導故名

黃塘坡在縣西北十五里晉龍驤將軍劉牢之救苻丕追慕容垂大軍于黃塘泉卽此坡也

肥鄉縣

上西北至州四十五里

本春秋時晉地七國時屬趙今縣卽漢邯鄲縣地魏黃初二年分邯鄲列人等縣立肥鄉屬廣平郡後魏省入臨漳隋開皇十年又置屬磁州十六年割屬洛州

肥鄉故城在縣西二十二里

平原君墓在縣東南七里

清漳縣

上西北至州七十里

本漢列人縣地按列人縣故城在今肥鄉界隋開皇十
六年于此置清漳縣南濱漳水因以為名屬洛州

曲周縣

上西南至州八十里

本漢舊縣屬廣平國鄴商為曲周侯後漢屬鉅鹿郡魏
屬魏郡後魏宣武帝改置曲安縣屬廣平郡高齊省隋
開皇六年復置屬洛州大業二年省武德四年于曲周
故城重置

漳水在縣西二十九里

阿難枯渠在縣南十四里

臨洛縣

緊東南至州五十里

本漢易陽縣地屬趙國後魏省入邯鄲縣隋開皇十年
移邯鄲縣理陟鄉城城在今邯鄲縣界仍于北中府城
別置臨洛縣北濱洛水因以為名屬磁州大業三年割
屬洛州

狗山在縣西十里山頂石上有狗跡因名武德五年太

宗親總戎討劉黑闥于此立營

平恩縣

上西至州八十三里

本漢舊縣也屬魏郡宣帝以許廣漢為平恩侯魏省尋

復置隋開皇三年罷屬洛州

康臺澤在縣東五里

磁州 滏陽上

元州戶一千四十 鄉一十三

案此州置自承泰故不載開元戶鄉與貢賦

本漢魏郡武安縣之地周武帝于此置滏陽縣及成安郡隋開皇十年廢郡于縣置磁州以縣西九十里有磁山出磁石因取為名大業二年廢以縣屬相州皇朝承泰元年重置以河東有慈州故此加石也

州境

東西一百七里 南北一百一十五里

八到

西南至上都一千五百四十里 西南至東都六百四十五里

南至相州六十五里 西至潞州三百四十里 正北微東至洛州三百十里

貢賦

元和貢 紗 鳳翮席 賦 綿 絹

管縣四

滏陽 邯鄲 昭義 武安

滏陽縣

望郭下

本漢武安縣之地魏黃初三年分武安立臨水縣屬廣平郡以城臨滏水故曰臨水以城在滏水之陽亦曰滏

陽周武帝于此別置滏陽縣屬成安郡隋開皇三年廢郡縣屬相州十年于此置磁州滏陽屬焉大業二年廢磁州縣屬相州永泰元年重立磁州縣又割屬

鼓山一名滏山在縣西北四十五里滏水出焉泉源奮涌若滏水之湯故以滏口名之八陁第四曰滏口陁山

嶺高深實為險阨

石季龍墓在縣西南十四里

佛圖澄墓在縣西南十七里

高齊神武陵在縣南三里

邯鄲縣 上南至州七十里

本衛地也後屬晉七國時為趙都趙敬侯自立晉陽始

都邯鄲至幽王遷降秦遂滅趙以為邯鄲郡邯山名也

單盡也城郭從邑故單字川邑魏以為縣屬廣平郡隋

開皇十年置磁州邯鄲縣屬焉大業二年廢磁州縣屬

洛州永泰元年重立磁州縣還割屬

邯山在縣東南五里

叢臺在縣城內東北隅

洪波臺在縣西北五里

趙簡子墓在縣西南十二里

公孫杵臼程嬰墓在縣西十五里

趙奢墓在縣西北七里

樂毅墓在縣西南十八里

藺相如墓在縣西南二十三里

昭義縣 上東南至州四十里

魏黃初三年于今滏陽縣置臨水縣北齊天保元年移
理松釜周武帝建德六年廢永泰元年再置仍改名昭
義

武安縣 上東南至州九十里

本七國時趙地趙將李牧封武安君卽今縣也漢屬魏
郡魏屬廣平郡隋開皇三年屬相州十年割屬磁州大
業二年磁州廢割屬洛州後置磁州又分隸焉

闕與山在縣西南五十里趙奢拒秦軍闕與卽此山也
洛水西北去縣八十三里

武安故城在縣西南五里六國時趙邑也趙奢之救闕
與秦軍鼓譟武安屋瓦皆動卽此城也

元和郡縣志卷十九



